



DEN E KATERN AKI

Lesamento liber **1**

E bentahanan di
lesamento liber **1**

Lesamento liber
den klas **2**

Ora un mucha
ta scoge un buki **2**
pa lesa

E importancia
di e maestro **2**

Lesu cu gana
loke bo kier lesa **3**

Biblioteca **3 & 4**



Lesamento liber (vrij lezen)

Lesamento liber, den cuadro di scol, ta ora cu duna e muchanan structuralmente chens pa lesa keto na scol, esta, tur dia na un ora indica. Asina e muchanan ta lesa continuamente y di e manera aki nan ta siña lesa tambe, scogiendo nan propio bukinan y textonan. Segun investigacion na Hulanda, ta calcula cu alumnonan di klas 1 te 3 tin necesidad di lesa minimo 350 minuut pa siman. Muchanan cu tin problema

pa lesa mester di un tiki mas tempo. Pa e alumnonan di klas 3 te 6 tin e necesidad di lesa un minimo 180 minuut pa siman. Despues cu un mucha a pasa su AVI-9 y ta drenta enseñansa secundario, e tin cu sigui lesa. Esaki ta pa su habilidad di lesamento no bay atras, pasobra sino e mucha tin tendencia cu e no lo bay lesa su bukinan di scol independientemente.

E bentahanan di lesamento liber

Lesamento liber tin varios bentaha. Algun di nan ta:

- Na scol, en general, e muchanan ta lesa texto cu e maestro ta duna nan. Ora di lesamento liber, nan ta haya chens pa nan mes scoge e texto, e buki cu nan kier lesa.
- Hopi mucha cu ta cuminsa lesa ta ripara cu ora cu nan lesa libremente, nan ta uza nan habilidad pa decodifica (spellen) pa asina lesa palabra nobo, cu nunca nan no a lesa.
- Varios investigacion haci tocante lesamento den klas of grupo di mucha demotiva ta mustra cu ora cu nan haya oportunidad pa lesa libremente, esaki por haci cu nan ta bay lesa mas.
- Ora cu e muchanan lesa libremente, e cantidad di tempo cu nan ta lesa fuera di ora di scol frecuentemente tambe ta aumenta. Hopi biaha e muchanan ta bay pidi nan mayornan buki pa lesa na cas.

- Hopi mucha cu pa cualkier motibo nunca no ta lesa na cas, na scol si ta lesa regularmente di nan mes, pasobra nan ta haya chens pa lesa libremente.



Bernice, Pius X School



Lesamento liber den klas

Con bo por laga un mucha lesa libremente den klas? Mescos cu lesa pa mucha, percura pa un ora fiho, por ehempel tur dia e ultimo 10 minuutnan di dia di scol of e prome 10 minuutnan despues di pauze.

- E muchanan ya tin un buki caba na momento cu cuminsa cu lesamento liber. Preferiblemente no uza e momento di lesamento liber pa busca buki den biblioteca di scol of klas.
- Cada mucha ta lesa for di un buki cu e mes ta scoge. E interes den e topico ta motiva e mucha pa purba lesa e buki, p'esey e nivel por ta mas halto cu e nivel di AVI di e mucha.
- Laga e mucha mes scoge un luga unda e ta sinti su mes comodo pa lesa y cu e les aki ta varia y diferente.
- Ta pidi e muchanan pa no papia of cana den klas durante lesamento liber pa ningun hende no por stroba nan di lesa.

- Mientras ta lesa liber, e placer di lesa ta central y no, por ehempel, e preparacion di un tarea tocante e buki.

Ora cu e periodo di lesamento liber caba, por papia cu e mucha tocante loke el a lesa.



Sven, Rosario College

Ora un mucha ta scoge un buki pa lesa

Pa yuda un mucha scoge un buki, por recomend'e lo siguiente:

- E tamaño di e texto: Mucho tiki? Mucho grandi? Net bon?
- E palabranan y regelnan riba un pagina: Demasiado? Mucho tiki? Net bon?
- E imagennan: Nan ta yuda mi lesa e palabranan?
- E palabranan: Mi por lesa tur? Mayoria di nan? Ningun di nan?

Pero loke ta mas importante:

- *Contenido*: Kico mi sa tocante e topico, e autor, e tipo di texto?
- *Ami como lesado*: Kico mi sa di mi mes como lesado y kico mi sa di e bukinan den klas, pa asina mi scoge e buki corecto pa mi lesa?
- *Motivacion*: Con duro mi kier traha pa siña lesa e buki aki cu mi a scoge?
- *Variedad y sentido*: Mi a scoge mas cu un tipo di texto y nivel di dificultad? Mi tin bon buki pa practica lesa(mento)?

E importancia di e maestro

E maestro su rol den esaki ta di sumo importancia, pasobra e mes mester ta un ehempel di un lector cu ta lesa libremente. Lesando e mes, e ta musta e muchanan cu e gusta haci esey. Purba lesa diferente tipo di buki, manera buki pa bo mes, revista, comics y buki cu e muchanan ta lesa. Loke e muchanan mester haci ora di lesa libremente, e maestro tambe ta hacie. Lesamento liber lo faya si e maestro henter ora ta controla si e muchanan ta lesa of kier yuda nan, na luga di e mes lesa.



Les a cu gana loke bo kier lesa

Lesamento liber mester forma parti di e programa di lesamento na scol. Esaki por contribui na un lesamento miho, cu placer y pa bida largo. Lesamento liber ta yuda mehora e resultadonan di lesamento di e muchanan, si bo motiva nan pa lesa buki y yuda nan cu nan interes den esaki. Nan mester por scoge loke nan kier lesa y e maestro

mester ta un ehempel di lesamento liber pa e muchanan, poniendo suficiente tempo pa esaki. Den klas semper mester tin hopi material di lectura disponibel tocante tur clase di topico, na diferente nivel ★ di lesamento y den diferente idioma.



Biblioteca



Un biblioteca “tradicional” ta compila, ordena y pone documentonan na disposicion, manera ta e caso di Biblioteca Nacional di Aruba. E rol di Biblioteca Nacional Aruba ta pa sirbi publico y sigui compila informacion pa educa tanto chikito como grandi. Pero, un scol tambe por tin su mesun biblioteca.

Biblioteca di scol

Biblioteca di scol ta un di e instrumentonan importante pa promocion di buki y lesamento na scol. E ta e luga caminda e experiencia cu lesamento y e interes pa lesa ta cuminsa y keda stimula. Si no tin un bon coleccion di buki cu ta atractivo, anto lo tin scarsedad na motivacion pa bay lesa. E coleccion mester ta varia y actual.

Ademas, e mester ta apropia pa tur klas y tur grupo di lesamento. Ora cu no tin suficiente espacio pa un biblioteca di scol, un biblioteca di klas ta un bon alternativa.



Colegio Ora Ubao



Biblioteca di klas

Ora cu nos kier motiva mucha pa lesa, nos mester percura pa:

- e bukinan muestra atractivo
- e bukinan ta actual
- e bukinan ta ofrece topiconan interesante
- e bukinan ta den bista y disponibel pa e muchanan y cu nan ta haya e tempo tambe pa lesa libremente

Pa e biblioteca di klas ta mas ideal ainda, hopi biaha ta combin’e cu un huki di lesa. Un huki di lesa bon ekipa y hinca den otro ta un extra motivacion pa e muchanan lesa.

Colegio Sta. Filomena

Huki di lesa



Colegio Sagrado Curason

Tocante huki di lesa, nos por ta breve pero motivante.

Mucha ta haya hopi dushi pa pasa tempo den un luga "special" manera un huki di lesa. Na Aruba nos tin di haber cu espacio limita pa diferente motivo, manera hopi alumno den klas, extra cashi di Traimerdia, luganan alternativo relaciona cu renobacion di scol etc.. P'esey, aki ta sigui algun ehempel di huki di lesa den klas di diferente tamaño a base di e espacio cu tin; for di un espacio chikito te na grandi, nan a crea un huki di lesa den klas.



Prinses Amalia Basis School



St. Dominicus College



Prinses Amalia Basis School



Colegio Sta. Filomena



Scol Caiquetio